



UPA2017/11  
1. Juni 2017  
Mala Høy Kúko

**2016-imut Nunatta Karsiata naatsorsuutaasa akuersissutigineqarnissaannik siunnersuut**  
(Aningaasaqarnermut Aatsitassaqaqarnermullu Naalakkersuisoq)

Aallarniutingalugu ATASSUT-mit Naalakkersuisut qutsavigissavagut Nunatta Karsiata 2016-mut naatsorsuutaannik saqqummiussineranut.

Ukiut kingulliit nunatta aningaasarsiornikkut sukateriffiusimanera tamatsinnut arlaatigut qularnanngitsumik sunniuteqarsimasoq malugivarput, pisariaqarsimavorlu aningaasaqarnikkut aqutsinerup sukateriffigineqarnikuunera, tassaniimmat aamma pisortat aningaasaqarneranut aningaasartuuteqarnikkut atuiffiusut sukumiinerusumik eqqummaarinnerulerfigineqarneratigut.

ATASSUT-mit naammagisimaarnarpoq Nunatta Karsiata 2016-mut naatsorsuutaasa inerneru, imaannngitsorli taamaannera pillugu tassa eqqissilluta pissutsit pissusissamisut ingerlaannarnissai naatsorsuutigissagipput.

ATASSUT-mit takulluarnarpoq Nunatta Karsia 2016-imi sinneqartooruteqartoq, tassami saqqummiunneqartumi pitsaasup tungaanut nikeriarfiummat aningaasaliissutit ilanngullugit 100 mio. koruuninik amigartooruteqartussatut missingersuusiortoqarsimagaluartut, angusaqafiusoq tassaammat katillugit 311 mio. koruuninik pitsaanerullutik nikingassuteqarlutik.

ATASSUT-mit isumaqarpugut pingaaruteqarluinnartuusoq, suli ingerlaqqiffiusussami sukangasuumik aningaasaqarnikkut aqutsinerup ingerlanneqarnissaa, aammalu Namminersorlutik Oqartussani taakkulu iluini oqartussaqaqarfinni assigiinngitsuni ataanni inissisimasut susassaqaqarfinni aningaasartuuteqarfiusuni aningaasartuutinut eqqummaarinnerunerup sukumiisumik suli attatiinnarneqarnissaa.

Nunatta Karsiata 2016-mut naatsorsuutaasa maanna oqallisigineqarneranut atatillugu ATASSUT-mit suut tamaasa susassaqaqarfiit oqaaseqaqarfigisinnaanngilavut, taamaattorli susassaqaqarfiit maanna siullermeerinninnermut atatillugu oqallisiginninnermi pisarialittut qaqinneqartariaqarsorisatta ilaminngui qaqileriffigilaassavagut.

ATASSUT-mit iluarisimaakkatsinnik takusinnaavarput aalisarnerup iluani nunarsuarmi akigissaartitsisimanerup malitsigisaanik aalisarnermi isertitsinerit annertuseriaateqaqqissimaneri, taamaasillunilu akitsuutitigut aamma Nunatta Karsianut isertitat takusaqartitsilluaqataallutik. Taamaattumik aamma ATASSUT-mut pingaaruteqarpoq, suli annerusumik ingerlaqqiffissami isiginiarneqassasoq saarullinniarnarup siunissami annertusiartuinnartussap qanoq nunatta iluaqutigisinnaaneraa, tassanilu isiginiannarnagu aamma ineriartortitsivissaalluartuni tigussaasumik sumiiffinni malinnaatitamik inerisaasoqarluassasoq saarulliit nunatsinniinnerat inerisaatigilluarfigisariaqaratsigu.



Aammattaaq ATASSUT-mit isumaqarpugut, pingaaruteqartoq siunissami sulii innaallagissamik inermillu pilersuinerup tungaatigut unammillerluarsinnaasunik nunami suliffeqarfissuarnut tunisassiorfinnullu atugassaqartitsisinnaaneq sammivilersorluarneqaannassasoq, taamaasiornikkummi Kalaallit Nunaata nunarsuarmioqatigiit akornanni tunisassiorfeqarnikkut unammillerluarsinnaassuseqarnerannut nangittumik annertusaataasinnaamat. Tassuunakkullu aamma ingerlaqqiffiusumi suliffeqarfiit ataavartut pilersiororneqarsinnaanerussammata nunami inuutissiarsiuutit akornanni.

ATASSUT-miit isumaqarpugut, nalunaarusiarineqartutuut

Kukkunersiuiinermut Ataatsimiititaliaq avataanit kukkunersiuisut kukkunersiuisutut oqaaseqaataannik tigusaqarsimanera najoqqutaralugu, Naalakkersuisullu oqaaseqaatini inassuteqaatigineqartut oqaaseqaatigineqartullu pillugit ataatsimiititaliamit apeqqutigineqartunut allakkatigut kingusinnerusukkut nalunaarutigineqartutut akissuteqassapput.

Taamatut ATASSUT-mit oqaaseqarluta, qilanaarivarput Inatsisarut Kukkunersiuiinermut ataatsimiitsitaliaanni suliap ingerlateqqinneqarnissaa, taavalu naatsorsuutigalutigu ukjaru Inatsisartut ataatsimiinneranni suliaq inaarsarlugu Nunatta Karsiata 2016-mut naatsorsuutaasa akuersissutigineqarsinnaanissaa.

Qujanaq!